

## Skrifgedeelte: 1 Petrus 2:11-17 en Titus 3:1-8

### Fokusverse: 1 Petrus 2:15-16

#### Tema: Doen goed as 'n dienaar van God en lewer só 'n getuienis van ware wysheid!

Daardie lastige, onbeplande verkeersboete in die pos. Daardie stopteken of verkeersirkel wat eenvoudig net nie sin maak nie. Die kontant-transaksie waarvan die SAID nie weet nie en wat jy dus nie "hoef" te verklaar nie. Die laaste bier of glasie wyn vir die aand wat jou eintlik oor die wettige limiet sit, maar wat jou nie laat dronk voel nie.

Hierdie is alles grys areas waar ons gehoorsaamheid aan die regering getoets word. Wanneer ons dan met 'n regering te doen het wat korrum is, wat die inwoners van die land uitbuit en wat in die woorde van Jeremia 22 "sy huis met onreg bou en sy bokamers met minagting van die reg", word hierdie grys area maklik 'n rooi area. Dan gebeur dit dat ons uit woede en protes net eenvoudig ongehoorsaam raak. Só het ek, na die optrede van Hlaudi Motsoeneng, gedink dat ek nie meer my TV-lisensie gaan betaal nie uit protes teen sy optrede. Ons sal dalk nie toi-toi en klippe gooi nie, maar met my optrede en woorde sal ek wys dat ek ongelukkig is.

Maar hóé gemaak in só 'n situasie? Ons hoor in 1 Petrus 2:13-17 en Titus 3:1-8 dat Petrus en Paulus van ons verwag om gehoorsaam te wees aan die regering. Hierdie is ook nie die enigste twee gedeeltes in die Here se Woord waar hierdie opdrag vir ons gegee word nie. Dink maar aan Romeine 13 waar Paulus sê dat elke gelowige **verplig** is om hom of haar aan die owerheid te onderwerp. Ons sal dalk wil redeneer en sê dat dit makliker vir Petrus en Paulus was, want die regering van daardie tyd het anders gelyk as die regering van vandag en alles het "gewerk" onder daardie regering. Tog bly die beginsel dieselfde ongeag watter vorm van regering dit is. Die beginsel is dat elke vorm van gesag van God kom en daarom moet ons gehoorsaam wees.

In 1 Petrus 2:15-16 gee Petrus egter vir ons nog twee redes vir hoekom ons gehoorsaam moet wees en hoe ons moet optree teenoor 'n regering wat homself vergryp aan die land. Die eerste rede is dat dit God se wil is dat ons goed moet doen. Die tweede rede is dat ons vry gemaak is om dienaars van God te wees.

Dit is redelik maklik om te verstaan dat iets God se wil is en wat dit beteken dat dit God se wil is. God is die ewige Koning en Skepper oor die heelal en om hierdie rede kan en mag Hy doen wat Hy wil. God se wil en wat Hy mag doen word nie ingeperk deur 'n aanstellingsorde of 'n wetboek nie. God wil en daarom is dit.

Maar wat beteken dit om goed te doen en hoe pas dit in by ons Christen-wees? Om goed te doen is nie maar net om iets oulik of mooi te doen waarvan baie mense hou nie. Om goed te doen is om iets vanuit my verhouding met Jesus Christus te doen. Omdat ek weet dat Christus dit wil hê en omdat dit goed in Sy oë is, daarom doen ek dit. Ons kan amper sê dat om goed te doen beteken dat ek vir Christus na doen.

As ons gaan kyk na Jesus Christus se tyd op aarde bestaan dit uit goed doen. Die wonders wat Hy gedoen het en dit wat Hy vir die mense geleer het, het Hy gedoen om dit goed te maak vir die mense. Hy het dit op 'n besonderse manier aan Filippus beskryf in Johannes 14:7-11:

*"As julle My ken, sal julle my Vader ook ken. En van nou af ken julle Hom en sien julle Hom.' Toe sê Filippus vir Hom: 'Here, wys vir ons die Vader, en dit is vir ons genoeg.' En Jesus sê vir hom: 'Ek is al so lank by julle, en ken jy My nie, Filippus? Wie My sien, sien die Vader. Hoe kan jy dan sê: 'Wys vir ons die Vader'? Glo jy nie dat Ek in die Vader is en die Vader in My nie? Die woorde wat Ek met julle praat, praat Ek nie uit my eie nie; maar dit kom van die Vader wat in My bly en sy werke doen. Glo in My omdat Ek in die Vader is en die Vader in My; of anders, glo op grond van die werke self."*

Ware goed en ware goed-doen beteken in wese dat ek iets van God bekend maak. En ware goed beleef en leef ons net wanneer ons in 'n intieme verhouding met God staan deur Jesus Christus en wanneer Jesus Christus se gesindheid ons gesindheid word. Dit is 'n gesindheid waar ek deur gehoorsaamheid diensbaar is vir God en die mense rondom my.

En dít is ontsettend moeilik, want dit vra selfopoffering. Dit vra dat ek verby die korruksie en my woede en frustrasies kyk en die potensiaal raaksien om iets wonderlik en betekenisvol te doen in die omgewing waar ek is. Dit beteken dat ek 'n graaf optel en die slaggate in my omgewing begin regmaak of dat ek 'n koppie en 'n ketel vat en begin koffie, tee en broodjies gee vir die mense by die staatshospitaal omdat daar nood is.

Maar beteken dat ek ook met die regering praat oor dit wat aan die gang is en dat ons daarvan oortuig is dat God hulle daar geplaas het om só te regeer dat dit tot die voordeel is van alle inwoners van die land. Ons kan die Here dank dat ons nog in 'n land woon waar ons as kerke deur deputate met die regering kan praat en ons moet ook vir hulle voorbidding doen. Dit is een van die maniere hoe ons besig is om te getuig van die ware wysheid wat daar is wanneer mens die Here dien.

Die tweede rede vir hoekom ons gehoorsaam moet wees, is omdat ons vry gemaak is om dienaars van God te wees. Ware vryheid is om só te leef dat dit niemand seer maak nie. Wanneer ons in gehoorsaamheid aan God leef, sal ons nie mense rondom ons seer maak nie, maar juis só leef dat verhoudings herstel word en die wonde wat daar in ons samelewing is genees word.

Maar meer as dit: wanneer ons gehoorsaam is ten spyte van die negatiwiteit lewe ons 'n getuienis dat ons dienaars van God is en dat ons aan Hom behoort. Op die einde beteken ons verhouding met God in en deur Jesus Christus dat ons nie twee verskillende stelle etiek kan hê nie. Ons kan nie in sekere dinge gehoorsaam wil wees en in ander nie. Ons verhouding met God in en deur Jesus Christus maak ons vry om in alle dinge God eerste gehoorsaam te wees en dan ook die regering van die dag.

Op hierdie manier sal ons 'n einde maak aan die kwaad wat mense uit onkunde praat. Onkunde wat wys op 'n gebrekkige of afwesige verhouding met God waar dit net oor selfverryking en die eie-ek gaan. Onkunde wat skadelik vir die land en sy mense is en wat God van sy eer beroof. Onkunde wat deur ons stil gemaak word wanneer ons uit ons verhouding met God goed doen in 'n land wat dit nodig het. Mag God ons deur die Heilige Gees bystaan om juis dit te kan doen.

Amen